

# SOLENITÂT DE SANTISSIME TRINITÂT

## Jutoris pe Liturgjie

Domenie, ai 7 di jugn dal 2020

*Alore Gjesù ur vierzè la ment par lâ a font des Scrituris* (Lc. 24, 45)

### Vite - Bibie - Popul

pre Antoni Beline e une sô opinion di îr - par fânus rifleti vuê

\* \* \*

### **Pe Bibie, Diu al è il trassendent**

Se leint la Bibie o rivassin a vê clare ancje dome la idee che Diu al è il trassendent, (*al di la di chest mont, al di sore di ogni nestre immagjine e riflessione*) o varessin imparât za avonde. Almancul cemût che si à di tratâlu e rispjetâlu e ce che si à di spietâsi di lui.

In ogni pagjine si viôt chest Diu creadôr come Pari, salvadôr come Fi e consoladôr come Spirtu Sant.

Al à tes sôs mans il distin dai oms e dai popui; lui nol piert nuie dal so sflandôr ancje se l'om si dismentee o i dinee la laut ch'al à dirit, e al rive a puartâ a bon fin il so progjet par tant macaco o trist ch'al sedi l'om.

*Furtunât il popul che al è il Signôr il so Diu - par une leture sapienziâl de Bibie, p. 93.*

\* \* \*

*La liturgjie romane e pon a conclusion dai grancj events che o vin celebrâts tai timps di Avent-Nadâl, Coresime-Pasche, Pasche-Pentecostis- e pon come coronament la solenitât de Ss. Trinitât: un Diu che si è rivelât come amôr che al da vite e che noaltris o vin imparât a clamâ cui nons di Pari e Fi e Spirtu Sant. Al dîs S. Zuan apuestul: Diu al è amôr (1 Zn 4, 8).*

*Blaise Pascal (1623 - 1662) fra i tancj siei pinsîrs, al à vude une intuizion che e je restade tai secui: "Il cûr al à resons che la reson no rive a capî". Par chest ancje cuant che o farfuin di Diu al è miôr no butâsi sui resonaments de reson ma scoltâ invezit il consei di S. Pauli che al scrîf: Jo però us mostri une strade ancjemò plui alte (1 Cor 12, 31) che e je la strade dal cûr. Parcè che: come che il mont al è imbombât de sapience eterne di Diu cussì al è ancje travanât dal amôr de Ss. Trinitât.*

*Al è di just però domandâ: Ce amôr?*

*E cussì o stoi pensant a chê mari che e veve un fi disabil e che a lui i dedicave la sô vite. Ma il fi, tun moment di sbandament al à dât fûc a la cjase e si son cjatâts nûts e crûts cence nuie. No par chest, l'amôr de mari viers dal fi al è diminuît. Anzit, al à continuât ancjemò di plui: amôr gratuît par simpri. E je cheste une olme dal amôr di Diu viers di nô pecjadôrs.*

*O a chel câs li che il fi zovenut al jere ricoverât tal ospedâl, gravissim, par vie di un incident di sabide gnot. La mari lu assisteve dal lunis buinore al vinars sere cuant che al rivave il pari dal lavôr e si sarès fermât fin lunis a buinore cuant che e tornave la mari parcè che bisugnave partî par lâ a lavorâ. E di câs cussì ognidun indi cognòs. Olmis eroichis di chel misteri di amôr che al da vite e che nô o clamìn Diu.*

*Ma o podaressin dî che une olme de Sante Trinitât si cjate in ogni famee te unitât che l'amôr al done, te diviersitât che la libertât e rispiete.*

*L'amôr, nol esist nancje in Diu se nol è relazion e no esist relazion che no dedi gove vite.*

*Par svicinâsi al misteri dal amôr di Diu e de S. Trinitât nol covente che o ledin a cirî cui sa cuai mestris o ce grancj resonaments: nus baste lassâsi istruî dai spiêi di eroics amôrs umans e stâ*

*dongje a chel unic mestri che al è Gjesù di Nazaret. Lui al à vivût in maniere uniche e mirabil l'amôr dal / al Pari, la fiducie di Fi e la intime companie dal Spirtu Sant.*

### *Antifone di jentrade*

**B**enedet Diu Pari,  
e l'unigjenit Fi di Diu  
e il Spirtu Sant:  
parcè che grant al è stât il so boncûr par nô.

**Si dîs** Glorie a Diu.

### **Colete**

Diu, che mandant tal mont  
il Verbo di veretât e il Spirt di santitât  
tu âs rivelât ai oms il to misteri maraveôs,  
danus la gracie che, professant la vere fede,  
o podin ricognossi la glorie de eterne Trinitât  
e adorâ l'Unitât te potence de maiestât.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### **PRIME LETURE**

**Es 34,4-6.8-9**

**Signôr, Signôr, Diu bon cence fin.**

*Il Diu che nus ven presentât in cheste leture - Diu bon cence fin - intal secul XIII p.d.C. al jere unic plui che râr. In chei timps lis divinâts dal cîl, come vuê chês de tiere, par fâsi valê a vevin e a àn dibisugne di vitimis, di sanc, di vueris e di muart.*

*La grande manifestazion dal Diu amôr e compagnarà il popul di Israel intai secui fin al colm de rivelazion cuant che Gjesù te ultime cene i disarà a Filip: Chel che mi à viodût me al à viodût il Pari (Zn 14, 09).*

### **Dal libri dal Esodo**

In chei dîs, Mosè, jevât denant di, al le su la mont dal Sinai, come che i veve ordenât il Signôr, e al cjapà te sô man lis dôs lastris di pierre.

Il Signôr al vignì jù intun nûl e si fermà cun lui. Al clamà il non dal Signôr. Il Signôr al passà denant di lui e al berlà: «Il Signôr, il Signôr, Diu bon cence fin, ch'al stente a inrabiâsi e ch'al è plen di boncûr e fedêl, ch'al manten il so bonvolê cun miârs di lôr, ch'al sapuarte i fai, la tristerie e il pecjât ma che nol lasse che nissun no le fasi francje e al cjastie i pecjâts dai paris sui fîs e sui nevôts, fint a la tierce e a la cuarte gjenerazion!».

Mosè si inzenoglà svelt e si butà cul cjâf par tiere. Po al disè: «Se propit tu mi âs agrât, Signôr, che il gno Signôr al vegni vie cun nô, seben che chest popul al à il cjâf dâr; perdone la nestre tristerie e i nestris pecjâts e fâs di nô la tô ereditât».

Peraule di Diu.

### **SALM RESPONSORIÂL**

**Dn 3,52-56**

*Chescj versets a son cjapâts de lungje laude di Dn 3, 1-97, ma a son dome un esempli par che o imparin a laudâ Diu cu lis imagjinis de nestre esperience spirtuâl, de nestre vite, anime e cûr.*

*Al è masse pôc, anzit si disarès cence decoro laudâ il Signôr cun peraulis che no son nestris e cui aftets che a vegnin de sensibilitât di altre int.*

*Invezit, Benedet sêstu, Signôr par vie di chest e chest e chest...*

**R. A ti la laut e la glorie tai secui.**

*Se cjantât, : Il cjant dai salms responsoriâi, p.87.*

Benedet sêstu, Signôr, Diu dai nestrîs paris. **R.**

Benedet il to non sant e plen di glorie. **R.**

Benedet sêstu tal to templi sant e plen di glorie. **R.**

Benedet sêstu su la sente dal to ream. **R.**

Benedet sêstu tu, che tu stazis i abîs

e che tu sês sentât parsore dai cherubîns. **R.**

Benedet sêstu te volte dal cîl. **R.**

**SECONDE LETURE**

**2 Cor 13,11-13**

**La gracie di Gjesù Crist, l'amôr di Diu e la comunion dal Spirtu Sant.**

*Tant semplich biel, profont chest salût di Pauli a la comunitât di Corint. Tal volêsi ben il Diu dal amôr e de pâs al sarà cun vualtris. La comunitât, ma ancje la famee, a deventin cussì speli de Sante Trinitât, de famee dal cîl.*

*Ce che l'Apuestul al scrîf: la gracie dal Signôr Gjesù, l' amôr di Diu e la comunion dal Spirtu Sant a puedin sedi utopie, ma te esperience spirtuâl dal dissepul, dal sant, e puedin deventâ ancje mirabile realtât.*

**De seconde letare di san Pauli apuestul ai Corints**

Fradis, stait contents, smicjait a la perfezion, fasêtsi fuarts un cul altri, lait d'acuardi, vivêt in pâs. E il Diu dal amôr e de pâs al sarà cun vualtris. Saludaiti un cul altri cuntune sante bussade. Us saludin ducj i sants. La gracie dal Signôr Gjesù Crist, l'amôr di Diu e la comunion dal Spirtu Sant ch'a sedin cun ducj vualtris.

Peraule di Diu.

**CJANT AL VANZELI**

**cf. Ap 1,8**

**R. Aleluia, aleluia.**

Glorie al Pari, al Fi, al Spirtu Sant:  
a Diu ch'al è, ch'al jere e ch'al ven.

**R. Aleluia.**

**VANZELI**

**Zn 3,16-18**

**Diu al à mandât so Fi par che il mont al sedi salvât midiant di lui.**

*Se al è un Vanzeli che no si pues ridusi a schemis di resonament, al è propit il Vanzeli di Zuan li che dut al devente simbolisim, poesie, spirtualitât, vere e proprie contemplazion.. Cussi al è ancje di chest cjapitul tierç che so redut te ultime part nus mene tai misteris profonts de vite intime di Diu.*

*Svicinînsi a chestis pocjîs riis cun rispîet profont e tal cidin dal cûr. Fasìn spazi al aflât dal Spirtu Sant.*

**Dal vanzeli seont Zuan**

In chê volte, Gjesù i disè a Nicodem: «Diu i à volût tant di chel ben al mont, che al à dât so Fi, l'unigjenit, par che ducj chei ch'a crodin in lui no perissin ma a vedin la vite eterne. Di fat Diu nol à mandât so Fi tal mont par condanâ il mont, ma par che il mont al sedi salvât midiant di lui. Chel ch'al crôt in lui nol ven condanât; chel che nol crôt in lui al è za condanât, parcè che nol à crodût tal non dal Fi unigjenit di Diu».

Peraule dal Signôr.

**Si dîs O crôt.**

### Su lis ufiertis

Santifiche, Signôr nestri Diu,  
pe invocazion dal to non chescj regâi de nestre suditanche  
e midiant di lôr fasinus diventâ ancje nô une ufierte eterne.  
Par Crist nestri Signôr.

### Antifone a la comunion

Ga 4,6

Dal moment ch'ò sês fîs,  
Diu al à mandât il Spirt di so Fi tai vuestris cûrs,  
Spirt ch'al berle: Abà, Pari.

### Daspò de comunion

Ch'a zovin, Signôr nestri Diu,  
pe salût dal cuarp e da l'anime,  
chest sacrament ch'ò vin ricevût,  
e la profession de nestre fede te eterne Trinitât  
e te sô indivisibil Unitât.  
Par Crist nestri Signôr.

\* \* \*

### Cjants pe solenitât de Ss. Trinitât

Te lodiamo Trinità, n. 169;  
Laut al Signôr, n. 189;  
Lodate Dio schiere beate del cielo, n. 191;  
Tu sei la mis vita, n. 192;  
Tu sês la mê vite, n. 193;  
Se mi vuoi seguire, n. 194.

-----  
Cjantade dai trê zovins, n. 293;  
Cantico di Daniele, n. 299.

\* \* \*

### ***Relazione tra Dio Padre, Figlio e Spirito Santo e la sofferenza del mondo.***

Se questo Dio per il quale ciecamente uccidete ci ha fatti a sua immagine, ogni pallottola nel corpo di mia moglie sarà stata una ferita nel suo cuore (*Antoine Leiris*).

***La fede cristiana rivela un Dio coinvolto nella sofferenza del mondo e crocifisso a causa dell'amore. In un mondo di peccato e di violenza l'amore non può uccidere e distruggere senza, allo stesso tempo, smentire se stesso in quanto amore. Pertanto, all'amore non rimane altro che soffrire e morire.***

***In mezzo al male e alla violenza, l'amore non può vendicare e rispondere al male con il male, può soltanto soffrire, morire, resistere.***

***Davanti alla sofferenza dell'innocente, non c'è altro luogo per l'amore - e pertanto per Dio - se non immergersi dentro la sofferenza, al fianco del più debole e oppresso, soffrendo con lui. Solo così si può dire che l'Amore è il senso ultimo della storia, più forte della morte.***

***Solo così si può affermare che Dio è amore. Solo così si può capire la relazione tra Dio e il male, tra Dio Padre, Figlio e Spirito Santo e la sofferenza del mondo.***

*Maria Clara Lucchetti Bingemer*

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions di pre Antoni al è: pre Antoni Beline, Furtunât il popul che al è il Signôr il so Diu - par une leture sapienziâl de Bibie, Edizion "La Patrie dal Friûl", 1991.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*